



Աղբյուրը: PanARMENIAN.Net
 URL: <http://www.panarmenian.net/news/arm/?nid=28413>
 Ամսաթիվը: 30.01.2009 14:08 GMT+04:00

Հայաստանի ղեկավարությունն ու ժողովուրդը մինչ այժմ չեն գիտակցում Ջավախքին սպառնացող վտանգը

/PanARMENIAN.Net/ Հունվարի 22-ին ձերբակալված Գրիգոր Մինասյանը Ախալցխի ակտիվ հասարակական գործիչներից մեկն էր: Մինասյանը ղեկավարում էր «Երիտասարդական կենտրոնը, որը ինքնատիպ ազգային-մշակութային կենտրոն է Ջավախքի հայության համար: Մինասյանի հովանու ներքո կազմակերպվում էին տարբեր ազգային-մշակութային, կրոնական միջոցառումներ: Այդ մասին PanARMENIAN.Net-ի թղթակցին է ասել Է «Միտք» վերլուծական կենտրոնի փորձագետ **Էդուարդ Աբրահամյանը**: Նրա խոսքերով, արդեն մի քանի տարի է, ինչ ապրիլի 23-24-ին Հայոց ցեղասպանության տարելիցի օրը, Ախալցխի երիտասարդական կենտրոնը սգո երթ է կազմակերպում: «Ավելին, Ախալցխի շատ երիտասարդ հայեր, Գ.Մինասյանի ակտիվ գործունեության շնորհիվ այցելում էին համահայկական երիտասարդական-հայրենասիրական միջոցառումներ: Մինասյանը նաեւ օգնում էր երիտասարդ ախալցխացիներին ընդունվել Հայաստանի եւ Վրաստանի տարբեր բուհեր: Գ.Մինասյանի եւ նրա ընկերների գործունեության շնորհիվ Ջավախքի հայությունը սկսել է համախմբվել հայ ինքնության եւ հայկական ավանդույթների պահպանման շուրջ», - ընդգծել է Աբրահամյանը:

Հայ փորձագետը առանձնակի նշել է, որ Ջավախքի հայկական տարածաշրջանում Մինասյանը գործնականում միայնակ փորձում էր պայքարել Վրաստանի մշտապես ահազանցող հակահայկական, ուժացման քաղաքականության դեմ: «Երբ Վրաց Ուղղափառ եկեղեցին 2004-2005թթ. փորձում էր տիրանալ Սբ. Նշան եկեղեցուն, Գ.Մինասյանն ու նրա ընկերները հասարակության ամենակապիվ շերտն էին, որ պաշտպանում էր հայ եկեղեցին վրաց կողմի հարձակումներից: Գ.Մինասյանի ձերբակալությունն ու մեղադրանքը լրտեսության մեջ ուղղակի շոկ է առաջացնում: Դա ավելորդ անգամ ցույց է տալիս Վրաստանի ագրեսիվությունն Ջավախքում հայկական հասարակական գործունեության ցանկացած դրսևորման հանդեպ: Ծոկ է առաջացնում այն, որ Վրաստանի համար թշնամիներ են նրանք, ով չի խոսում վրացերեն, պահպանում է պաշտպանում է իր ոչ վրացական հանրությունը: Այս դաժան իրականության մեջ ոչ վրացական ազգության ցանկացած ոք, որ չի խոսում վրացերեն, սիրում է իր պատմությունն, ավանդույթները եւ մշակույթը, կարող է ձերբակալվել օրը ցերեկով: Բանը պաշտոնական կառույցների բանասարկությունները չէ, որոնց աշխատակիցները ցանկացած քրեական գործ սարքելու վարպետներ են, անկախ տարիքից եւ սեռից, այլ այն է, որ Հայաստանի հանրությունը, ղեկավարությունը եւ հասարակական գործիչները մինչ այժմ չեն գիտակցում թե ինչ վտանգ է սպառնում Ջավախքին: Գ.Մինասյանն ընտանիք ունի՝ կին, մայր եւ երկու փոքր երեխաներ, որոնք վերջերս մկրտվեցին սբ. Նշան եկեղեցում: Նա երազում է իր երեխաներին տեսնել որպես արժանապատիվ հայերի հայկական Ախալցխի քաղաքում, եւ հենց դա է այս մարդու ձերբակալության պատճառը», - ասել է Է.Աբրահամյանը:

Վրաստանի ՆԳՆ-ն ձերբակալել է երկու քաղաքացիների, որոնց կասկածում են ապօրինի զինված կազմավորում ստեղծելու եւ լտեսության համար: Վրաստանի ներքին գործերի աշխատակիցները հունվարի 22-ին ձերբակալել են Վրաստանի երկու քաղաքացիներ Գրիգոր (Գրիգոր) Մինասյանին եւ Սարգիս (Սերգեյ) Հակոբջանյանին, որոնց կասկածում են ապօրինի զինված կազմավորում ստեղծելու եւ լտեսության մեջ:

! Լրատվության արտատպելու կամ օգտագործելու դեպքում հղումը «PanARMENIAN.Net»-ին պարտադիր է: